



WRITERS' WORKSHOP (Ni 21 August, 2025)

TANGPHAI PRESBYTERIAN CHURCH
(Presbyterian Church of India)



Provisional Synod
A ni: 27th August, 2025

25th ANNIVERSARY

NEW LAMKA KOCHUAM

SILVER JUBILEE

(2000 - 2025)

"Lalpa'n thil lopi takte ei bawl piak ah, i kipak'u a hi" (Sam 126:3)

Thupi gentu: Rev. C. Lalremruata, Synod Consultant



NEW LAMKA KOCHUAM SILVER JUBILEE

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



KA THAGAU ZIAK BEP IN

- La Hatlona Pathian Thilhitheina Suklatna Ahi
- Khristian Sungkuan
- Khristian Sungkuan Hi Di - Pathian Lau

Editor : Rev. Kamkhotinthang Neihzial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonthang Vaiphei
: Upa Thualkholian
: Upa Nengsuanthang
: Pi Neikhovak, General Secretary, CKNP
: Tv. Lianmuanthang, General Secretary, CKKP

Business Manager : Tual Upa Langlalthamuan
TPC Office D. Phailian
P.O. Box 107 Churachandpur-795128
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man penuam leh a la thak nuamte'n Business Manager kiang ah hiatsak di.

A SUNG AH THU UMTE

1. Editorial	01
2. Kochuam Huang	02
3. Ka Thagau Ziak Bep in	04
4. La Hatlona Pathian Thilhitheina Suklatna a hi	07
5. Khristian Sungkuan	14
6. Khristian Sungkuan Hi Di - Pathian Lau	17
7. Pathian Nasêmtu Ginum	19
8. Thiamzilna Pawimawdan	22
9. Khanglaite leh Politics	26
10. I Damlai Tuanthu Sut	29
11. KNP Huang	32
12. Sunna	34

SYNOD PUIPATE

Moderator : Rev. Vanlalchhuanga
Secretaries : Rev. Andrew LR Khiangte (Sr.)
: Rev. Summinlian Vaiphei (Jr.)
Finance Officer : Upa Tinliankham
Statistician : Rev. Thianganlim Vaiphei
Executive Secretary : Rev. Kamkhotinthang Neihzial
Consultant : Rev. C. Lalremruata

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Kochuamte'n Beigual Tha Taksa leh Thagau ah lawting tak ah i mat theina ding un.
2. I Revival speaker-teu leh a team-teu pauchapna'n delzui zing hitiu.
3. Missionary mun chuam chuam ah umte â ding in.
4. Kochuam tin in Sunday School naupang leh piting i ngaikhawk zawk sêrna ding un dawn hitiu. Chuleh Naupang Sunday School Kikhawmpi lawting tak ah mat a hi theina ding in pauchap hitiu.
5. Gamsung buaina ah panlatu pawl chuam chuam ah puitute â ding in pauchap hitiu.

KHRISTIAN HINDAN AH HIN

Hinna Vâk Simtu dawitak zosiate Beigual Tha lawk tak a mang chiat ding in dawisakna ka hun lân hi.

Khristian hindan ah hingte chu a ngaisan um ui. A nungchang, paukam leh kawng bangkim ah mite bildaw a hui a, a phatlona mu di umlo a hi pen hi. Khristiante hi lampi dik ah mite puihuaitu, gintâk leh nun det leh to i hi zing lai un, midangte leh ginglote'n i hinkhua ah hindan danglam bikna a mu' em? ti hi nisîn ah i kisui zing uh a pawmaw takzet hi. Tulai ah hin Khristian hindan pha suklatna hi a tawm hiai hiai ta hi'n a kilang hi. Suklat di tam tak um maleh Pathianni chan chungchang hi gen zui leuhin ka nuam hi.

Labour Law dungzui in Sumkawlveina mun/ Dawr/Dukan neite chun kal khat sung ah ni 1 hi chawl/khak tei tei di ti a hi. Khristian District i hi ziaik uh le hintin CCPur ADC chun Pathianni chawl/khak ding ah ei puan piak hi kipak um tak a hi.

Zia chu a hi zing lai in galbuai ziaik ah nek leh chak hawlna paume ah Khristian hindan ah hin di hemil a, Pathianni nek hawlna ah mang tam tak mu di a um tai. Lamka khawpi sung mun khenkhatte chu Sunday Market ziaik in traffic jam hialna mun le a lah um hi. A khawk ma ma hi. Zia chu ngaikhawk in Churachandpur District Christians Goodwill Council chun stakeholders (Village Authority leh CSO) bang a h'em zat kokhawm in pan lak didan a la genkhawm u'i. Zia nung ah chun mun khenkhat ah masawmna mu a hi lai in mun khenkhat chu chiadan ngai gual ah chia a um nalai hi.

Pathanni chan leh matdan chungchang ah hin i kochuam hin kikhaihuaina pha tak i nei hi. Gingtu zosiate'n Pathianni i chan ding uh a hi. Khawvel nâ seplâwk thei leh ni dang ah bâwl thei – châwk leh zawk te, etc bawlo di a hi. Kichawl-damna' mang ah ipmut mai mai te leh eima mimal mamawte chawm-khâwmna ding ah matlo di a hi. Pathian biakna leh a thu ngaithakna ding ah te, thagaulam â ding ah phachuam di taphawt bâwlina ding in i mang ding uh a hi (Pdt 20: 8-11; Isa 58:13, 14). Pathianni hun awl a hi tia, insung kin leh mi venate ah matlo di a hi (nau min phuak, etc). Kisuklimna mun/Park te haw ah le chialo ngam di a hi. Pêl theilo thil- thina leh damlonate a hilo chun Pathianni chan guat ham ham di a hi.

Paul in la umdan uh chu Khrista Chanchinpha tawh kituak sak phawt ta un a ti gual in Lalpa dawidan hinkhua mang leh hinkhua kitheng danglam, khawvel dawidan ah um talo ah, i umchanteu leh i tawi danteu hi eimau dawilam sang ah Lalpa dawidan zawk ah hing zaw ta ding ah pan lâk chu ***Khristian hindan ah hing*** a hi ti hemil pua'itiu. Kochuam mipite hi Pathianni chan leh matdan chungchang ah midangte ettawn hi ding in pan la zing hitiu. Hinna Vâk simtute zosia Lalpa'n hun malzawl chiat ta hen!



Kochuam Huang

Writers' Workshop

Synod Literature & Publication Board malakna Ni 21 August, 2025 (Ningani) in Thangkai-Lungpau Hall ah Writers' Workshop lawting tak in matzaw a hi. Resource Person in Rev. Kamkhotinthang Neihzial, Executive Secretary leh Upa Dr. Soilalsiam, Principal RMHS a pang u'i. Writers' Workshop ah hin mi 80 vel a pang thei u'i.

New Lamka Kochuam Kum 25 tinna

New Lamka Kochuam Kum 25 tinna Silver Jubilee chu Ni 27 August 2025 (Nilaini) in a lawm ui. Zia hun ah hin Jubilee Suang hawwna Rev. Thanglianlal, Bialtu Pastor in a nei ah, Souvenir hawwna leh latna Rev. Kamkhotinthang Neihzial, Executive Secretary in nei ah, Thugenna Rev. C. Lalremruata, Consultant; Rev. Vanlalchhuanga, Moderator leh Upa Pauzalel te'n a nei u'i. Synod Choir, New Lamka Pastor Bial Lapawl leh New Lamka Kochuam Lapawl te'n Pathian pakna Lâ a sa thei ui. Programme lawting tak ah mat a

hi zaw nung in nitaklam ankuang um khawmna a um hi.

Finance Campaign neizaw thu

Synod Finance Committee malakna kum 2025 Finance Campaign chu Pathian mapuina zal in lawting tak in matzaw a hi. Thembasuk Pastor Bial in Ni 2&3 August, 2025 in Rev. C. Lalremruat, Consultant leh Rev. Kamkhotinthang Neihzial, Executive Secretary malatna in Finance Campaign chu a lah mang ua, Pastor Bial dangte'n Ni 30&31 August, 2025 in a mang thei u'i (OM 49:5 dt. 22.07.2025). Kochuamte'n Pathian malzawlna dawng in Thilpiak lam inle malam i sawn zel zia un Pathian kiang in Kipak thu gen hitiu.

Beigual Tha

Pathian mapuina zal in Beigual tha i tungto kit tau ah, Kochuamte'n Beigual Tha hi Taksa leh Thagau ah malzawlna tamtak tawh mangthei chiat ding in Pauchapna tawh panla zing hitiu.

Naupang Sunday School Kikhawmpi

Ni 14 September, 2025 leh ni 21 September, 2025 te

HINNA VÂK

ah hin Naupang Sunday School Kikhawmpi leh Senior Department Kikhawmpi Pastor Bial tin in eima lemchan dan chiat ah mang di ihu a, Naupang Sunday School te'n Kikhawmpi hi Pathian thu leh Lâ ah khanletna leh malzawlina tamtak tawh a mat theina ding un Pauchap pi hitiu.

Revival Speaker-te kalsuanna

Tangphai Provisional Synod Revival Speaker-te maban ah Bial leh Kochuam ah Revival Crusade nei didan ziagual hi a hi.

Bethel Team - Pu Kamzathang

Hermon Team - Tv. ST Satboi

Jeriko Team - Tv. M. Sasang

Ebenezer Team -

Tv. Duhlian Pauthianmang

REVIVAL SPEAKER-TE KALSUANNA			
Sl.No.	Team	Bial/ Kochuam	A hun
	Ebenezer	New Lamka Kochuam	3-7/09/2025
	Jeriko	S. Kawtlian Pastor Bial	3-7/09/2025
	Bethel	Nazareth Kochuam	1-14/09/2025
	Bethel	Hill-Town Kochuam	15-21/09/2025
	Bethel	Buallian Kochuam	24-28/09/2025
	Jeriko	Zion Kochuam	25-28/09/2025
	Ebenezer	Gangpimual Pastor Bial @ Gangpimual	26-29/09/2025
	Hermon	Dumlian Pastor Bial	3-5/10/2025
	Ebenezer	Munpi Pastor Bial	3-5/10/2025
	Hermon	S. Zezaw Kochuam	15-19/10/2025

*Pathian chun craws ah khan a hepina a hung sulang ta a hi.
Kraws lêkah Jesu khaiân a hi ah, a thisan hung luangtha chu
Pathianin khawvel kiangah “Ka hung hepi hi” a tina a hi.*

~ Billy Graham

KA THAGAU ZIAK BEP IN

~ Rev. C. Lalremruata
Consultant

*“Zia hi Zerubbabel kiang ah Lalpa thu hun gen chu a hi:
Thagum hatna ziak hilo, thilhitheina ziak le hi diak lo in, ka
thagau ziak bep in a hi, ti’n sepai honte Lalpa chun a ti’n.”*
Zekariah 4:6

Thumapui: Pathian kipuanna thu giltak Jawlnei Zekariah mang ah puandaw kilâkna khen nganna (5) hin i mu’u ah. Zilna lam ah chun temple tundinna ding in mihing hatna leh theina mang ah tundin hilo in, Pathian Thagau Thiangtho thilhitheina ging ah din a hi zia a thu hin a keng hi. Zia thu hi mang in mihing ah temple tungdawk ding ah Pathian in thilhi a guat genna’n mang di i hiu.

Pathian kumtuang thiltup gil leh lul tak, thagau lam thu, ziatlak in a phun lut a hi. *“Thagum hatna ziak hilo, thilhitheina ziak le hi diaklo in, ka thagau ziak bep in a hi,”* ti hiat bep in hethiam suaklo ma leuhin lunggil a suling

sek hi. Pathian Thu hi a hu thakhum vek a hi i ti lai in, a kiselgu khat chu a um ngei di a hi. Zia lak ah pakhat chu i thupi’u hi a hi.

1. Pathian in a hatna leh thilhitheina mang in Israel chate a pui a, Aigupta gam ah kipat suak a hi nau apat puidawk in a thilhitheina nasa tak a mang hi. Aigupta Leng Pharoah lungthim tâk tak mai a hinêm thei hi. Suak leh sal ah kipat Israel chate a pawt ni’u khan Pathian in Aigupta mite lungsiatna a chansak ah, tichun a gothil nei zosiau a piak nasat ma ma ziak un Bible chun, “Aiguptate chu a suam gam tau a” (Pdt 12:36) a ti hial a hi.

HINNA VÂK

Tuipi san a kân ua, lei hul in a gâlkai u’i. A melmau hung delte zosia Tuipi San in a tum mang zo tau hi. Thamuang leh lim tak in tuipi gei in Miriam a lâm a, thilhitheina zia ah hukdamna lopi a chan zia Lampa chu a ti, Lampa leh a suak Mosi chu a ging tai (Pdt 14:31)

Malam zuan in a chia un, tuikha umna mun a tung tau ah, sa nek di neilo in a um ua, phunnawina leh gensiatna hun a mang zing u’i. Sal ah kipat hukdawk theitu Lampa a ginna’u a hedawk zo ta lo uh a hi. Sukgentheina apat hukdawkna, a hatna leh thilhitheina mang ah a pui lai bep ah Pathian lam ngat chu Israel chate mizia a dia aw... a ti thei hi. I etchian thak kit a hi chun Israel chate bep hilo in tulai mihing nungchang umdan a hi ta a hi.

Pathian in Temple i lunggil ua a kaw i dawipen chu Jawlnei Mikah chun hiti hin a la gen hi, *“Aw mihing, a pha kiti chu a hun hil tai; Lampa’n nangma a hun phûtna chu, dik tak ah bawl leh lungsiatna ngainat ah, thunuaigawl tak ah la Pathian tawh kitawn*

hilo a hem?” (Mikah 6:8). Zia nun hi a chan theina ding un Mosi mang in Dân a pia, Jawlneite mang in a hiatsak ah, Lengte mang in a hatna leh thilhitheina a latsak hi. Himaleh, Pathian thiltup chu Israel chate’n a puksiat piak tau ah, a melmate’u in zo in sal in a pui tau hi.

2. Israel chate’n hun nuam leh zalen a mat lai uh, kum zabi pagiatna hunlai in Jawlnei Zekariah chun, *“Thagum hatna zia k hilo, thilhitheina zia k le hi diaklo in, ka thagau zia k bep in a hi,”* ti in a la genzo ta a hi. Thagau Thiangtho chun a thilhitheina chu mihing sunggil a lua dim ah, mihing in a hitheilo chu hi thei ding in a pui ah, a lungthim dawidan leh tup a tunpi a hi.

I hatlona leh i fellona mang in ei sawisa pua, i hatlona leh fellona ei hiat thiam piak bep hilo in i theina mei ei sêm al piak sek a, thil hi thei talo chu hi thei ding in ei hihat hi. Mosi Dân pakhat bep zawmlo chu Dân bawtsia a hui ah, thagau thiangtho chun zia dan chu

zawm thei ding in a hihat ah, a ma'u a pui hi. Jesu'n *"Banghilehle, ama Thagau thutak chu a hung tun tak leh, thutak zosia'n hun pui lût intin, ama phuak kawm in thu gen pua'n tin, a het tapote chu gen intin, thil hung tung dingte chu hun hiatsak in a,"* ti'n a gen hi (Johan 16:13).

Thagau Thiangtho neitu leh a umpina'n a puite nun ah thil tung hi khawvel mite ngaidan in 'a mak na e' ti mai di hileh a kilawm hi. Pawsal hual lai nei Mari chun nau a vawp a, a pawsal lai â a hipua, Thagau Thiangtho in a liakhu a, ama â ding in thil lau um a hi thu hetzui bangma a umlo a hi. Penticost ni Thagau thiangtho hung tung ah i mu'u chu mi dawilok Peter chu hangsan tak in sukdanglam a hi.

3.1 Pathian in a kipuanna, "Thagum hatna ziak hilo, thilhitheina ziak le hi diaklo in, ka thagau ziak bep in a hi," ti hi tudet in zawm hitiu. Jesu Khrista ah Pathian in ei tatdawna hi zawm in Pathian vaiguan hi zuilo di i hiu em? Thagau Thiangtho

chu hatlote suhattu, thilhitheilo ah i ngaite hitheisaktu a hi. Gitlona nusia theilo chu hatna thak nei in a siam a, thilhitheina lopipen chu mani gitlona nusia ngam ah Khrista ah hindan thak ah a hin theina hi a hi, zia thilhitheina chu Jesu Khrista Thagau Thiangtho nasep Pathian hepina liau liau a hi.

Lekha thiam leh thiamlo hilo in Pathian thiltup "ka thagau ziak bep in a hi" ti hi i zawp uh a pawimaw hi. Lekha thiamte hin khawvel thil leh hindan a muchian ma ma ua himaleh, Lalpa thagau zawmtute chun khawvel a muchian ua, khawvel zotu a hi sek u'i. La phuaktu chun, *"Ka thagau in a zawm tai, Khrista grape nung chu"* a ti gual in Lalpa thagau zawm ding in i kisak ding uh a hi. Tichun, i damsung khualzinna lampi lamsuk lamto ah Pathian tawh lengkhawm in i lunggil ah Lalpa'n Temple a dawih leh a kineppi nei in khang lian zel hitiu.

Lalpa'n a thu malzawl ta hen! Amen

LA HATLONA PATHIAN THILHITHEINA SUKLATNA A HI

(II Korinth 12:5-10; 13:4)

~ Rev. T. Zuanlal
New Lamka (G)

Pathian in mihatlote a hepi in, amau haw ah pat in a thilhitheina a latsak sek hi. Khawvel ah mihingte hi hatlona nei chiat i hui a. Hatlona leh bukimlona hi taksa, lunggil leh thagau ah hin a um hi. Mihatlote hin Pathian in ei mattheina ding ah, i hatlona zosiau Lalpa Pathian kiang ah piak sang in, i hatlonateu, i titlonateu haw suanlam ah mang in Pathian ang a kisêlna in i mangzaw sek uh a hi. I hatlonateu leh i bukimlonateu hi chanpal ah tung a hi pua, Pathian in a hiatlo ah i chung ah thiltung le a um diak puai. Zialo a chun i hatlonateu hi ei haw thîldan leh Pathian thîldan a kibang him him puai. Bible chun Pathian in, *“Ka ngaituanate hi la ngaituana sang in a sang zawi,”* (Isai 55:9) a tia. Ei haw geldan in vang Pathian in a mi mat nawpte chu mi bukim, mithiam leh mi chungchuangte hi ding in i gel sek ua. Pathian in a hileh chu i hatlonateu hi a lopina suklatna ding in a mangcha nuam zaw a hi.

A pian lim apat ah mitthum sa piang pa kha le mihing thildan ah chun ama gitlo ziaak a h'em a hilo leh a nu leh pa gitlo ziaak a h'em ah ziagual ah vangsiatna chu a chung a tung hi ding in a gingchau a hi. Lalpa Jesu chun mihing ngaitua khêl dai in Pathian nasep/ Pathian

lopina kilatna di a hi, a ti dai mai hi (Joh 9:1-4). Bible chun, *“Pathian in khawvel ah thil zâwngkhâl tak takte a têt hi,”* (I Ko 1:27) a tia. I hatlona hile Pathian thilpiak khat a hia, Pathian in i hatlona chung ah a thilhitheina a sulang nuam zaw a hi.

Pathian in a thilhitheina hi mite lak in phutlui in a sulang ngai puai. Lalpa Jesu'n le i hatlonateu a hia, thagau ah tasam i hui ti a hiat zia in 'mi vangpha la hui' (Mat 5:3) ti in, thagau ah gilkiat leh basamte a malzawl sek a hi. Bible ah Pathian in mihatlate, mi maimaite, a hatlonateu kihiatmawsak in, thupi tak ah a matte gen di mi a tam hi. Pathian in mi bukimte bep a mat hile vang, mihatlate â ding in Pathian in ei matna ding ah kinep phak di gual a hi puai. Pathian in mihatlate, mi bukimlate haw a matdan i mu leh ei haw mihatlate, mi phazolote hi nasatak in ei fui in ei tilkho a hi.

Sawlhchak Paul in a hatlona, 'ling' a ti kha gitlona a hipua, a ma ah hatlona um, a bukimlona a genna a hi. Zia hatlona chu khawvel ah thilhitheina bangmachan a hi danglam thei taklo, Pathian thilpiak chu a hi. Pathian kiang in le a hatlona chun a nutsia theina ding in thumvei set a dawn ah, himaleh, a pauchapna dawnhuna chu a haksatna lakmang piak talo

in, "Ka lungsiatna nang a ding in a huntawh hi," tiin a hi hat hi. Zia thumal 'a hun tawh hi' ti umzia chu, ka hepina hi nang â ding in a kiting ma ma hi tina a hi. Zia hatlona hi mi phaklona pianphung ah gualphaklona, damlona zia ah zawnkhalna haw hi a huap vek hi. Eima ah hatlona um hi hezing kawm a, eima i ki-etchian tak leh 'keivang Pathian in ei mang ngai ngai puana,' ti ding in thep in i um thei sek uh a hi. Ei haw bukimlo maleu hin, Pathian vang a bukim a hi. Paul in 'thilhitheina chungnung chu keimau ah hilo in Pathian â a hi ti a kilattheina ding in zia go (*Gospel*) chu leibêl in ka kawi tau a hi,' (1 Ko 4:7) a tia. Leibêl hi matchak sit um tak leh sevak tak, lûlna leh mel kilawmna neucha bep nei a hi.

Paul in, mihing titlodan leh hawmthaw i umdan tak uh taklatna in a mang hi. Ginla umlo hial in mihatlate chu matchak sit um tak i hui. Mihing titlo mama na hin, Pathian bukimna kiting tak mai chu ei musak hi. Ahinla,

mihatlo chun a hatlona hezing pum a, a hina gual gual ah Pathian kiang ah a kilatdaw phat tak ua leh Pathian in matlo in a kawi ngai pua, matchak thupi tak in a mangzaw sek a hi (1 Ko 1:26-28). Chuti a hi zia in Apostol Paul hi i ettawn ding un Pathian in ei la kawi piak chu a hi.

1. La hatlona pawm in

Mihing hi hatlona nei ngen i hui a, ahinla mi khenkhat chu a hatdan ah kingai in, midang hatlona sawiseltu leh genlang tu'n a pang sek u'i. Zia mite a ding ah chun mani hatlona, titlonate kimudawna ding in hun a lut ten maithei hi. Ahinla mi kuale a hatlona hi imlo ah, puanglangtute chun Pathian malzawl na a dawng zawu a hi. Thuthung Thak ah thupwandaw thupi pani vaktaklang leu hin, thil umdan i hiat thei zawkna dingun. Pakhatna chu Peter in Jesu a phuwandawna a hi. 'Nang Messiah Pathian hing chapa la hi' (Mat 16:16) a tia. Apanina chun, Paul leh Barnaba chu Lustra khua a missionary khual zinnau

ah khan a pian lim ah kipat keng zeng khat sukdamna a chan a khan, a khua mite chun a pathian uh chu mihing melpu a lakua hung kumsuk hi ding in a ngai ua, tichun Paul leh Barnaba chu biak a vaisawm tau a hi. Zia phat chun amaute gël inle a hinau chu ki-imlo in a kipuung lang ua, "keiu le nangmau gual a mihing ka hui," tiin a hinau diktak a gen uh a hi (Nas 14:8-15). Kochuam puitu tamtak in panina hi a hepha ngai seklo uh a hi. Eima hina kihiat ten hi pawimaw mama a hi. Mi khenkhat chu miten a pachat ua, a gen phat uh leh amau hina khêl ah kichawisang in thu a gen kha sek uh a hi. Ziagual mite chu Pathian in a mang thei ngai sek puai. Pathian in mi a mat nawpte chu a hileh Ama Pathian ngei hechiantu leh amau ngeile kua a hui em ti kihechiantute a hui. Eima kihiatchianna chun kisakthei malak sang in kingaitawm tak in a hina dan dan in kipawm thei ta di a hi. Chutichun, Pathian in ei mat theina ding in eimau ah hatlona um hi a thilpiak a hidan pawm in Pathian khut

in a kipelut ta a hi.

2. La hatlona ah lung awiin

Paul in Timothi kiang ah, “Lungawina tawh kithua ah Pathian ngaisakna hi lawkna thupi tak chu vang a hi him a hi” (1 Ti 6:6) a la tia. Pathian ngaisakna ziak a ga dawium tak chu lungawina a hi. Paul le a hina dan dan ah a lungawidan chu Korinth mite kiang ah lekhathawt a khan hiti hin a genlang hi, “Pathian lungsiatna ziak in ka hi’di gual tak ka hi zo tai (1 Ko 15:10). I hina, i hatlona kipawm thiam ziak in lungawina a piang thei bep a hi. Chuleh, eima hin i hat lai leh i phat thei lai in midangte haw hi pawimaw in i he bek pua, ahinla i hatlo hun leh i beidawn hun in chu midangte i mamaw kit sek hi. I hatlona chu midang tawh i kithuakhawmna ding ah kikân zawpna khau pha tak a hi. I hatlonau chun Pathian ei bêl nai sak a hi. Pathian mite chun, ‘malzawlna kisêlgu a hi,’ a la ti sek u’i.

Missionary thupi Hudson Taylor chun, ‘Pathian mithupi zosia chu mihatlote,’ a hui a

tia. Pathian mi Mosi hatlona kha a lungnatna kha a hi. A lungnat ziak in Aigupta mikhat a that ah, Meriba ah suangpi a tui a sut pawtna leh Thusawm Piak suang le a sep kêk hi. Ahin ziagual mi chu hiziang ta malehle, Pathian in Mosi a hidanglam ah, “Mosi chu leichung ah mi zosia lak ah thunuaigawl leh nunnem pen a hi,” (Kis 12:3) a la ti. Gideon hatlona chu mani kimuanna neilo mi himaleh Pathian in a hidanglam ah, “Nang mihat, galdo hangsan,” a ti a hi kha (Vai 6:12). Peter hatlona a hileh dawilawkna leh launa a hi. Lalpa’n a hidanglam ah ‘suangpi’ ti a hita (Mat 16:18). Pentikost ni khan hangsan tak in thu a gen a hi (Nas 2). Leng lopi David hatlona a hileh zawntatna a hi (1 Le 15:5). Himaleh, Pathian in a hidanglam ah, “Ka lungthim gual pu,” a la ti a hi (Nas 13:22). Johan mi huham, vângi chate ti hial hilehle, Pathian in a hidanglam phat in, ‘Jesu’n a hepi’ (Joh 13:23) ti a hi ta, tichun ama chu “Hepi Johan” ti a hitai.

HINNA VÂK

A dik tak in Pathian in i hatloneu chu i hatnapen a chansak thei hi. Aman i hatlonapen ah kipat in ei hidanglam nuam a hi. Pathian in Paul kiang in 'ka thilhitheina hi hatlona ei vei sukpitin ah a um sek,' a ti. Pathian in zia gual a chun a genphat ah chun Paul in a hatlona chu a hun pawm theita, lungawitak leh kipak tak in 'Ziaziakchun Khrista thilhitheina chu ka chung ah a um theina ding in, kipak tak in ka hatlona hi suang zaw ta'ngka, ka hatlo phat sin leh ka hatsek ngala' a ti thei ta a hi. A hatlona chung in le a hina dan dan in a lungawi thei ta a hi.

3. La hatlona dik tak in genlang ngam in

Pathian nasep hi haksatna thuak theina ah kipan a hi. La hina, la mantheilona, la hatloneu la gendawk a, mi dangte haw kiang a haksatna pat malzawl na la dawndan la sukrat ngam chun Pathian in midangte malzawl na ding in hun mang di a hi. A diktak in Pathian in i hatloneu hi, hatna leh malzawl na a chansak thei hi. Aman i hatlonapen apat in

ei hidanglam nuam zing a hi. Sawlchak Paul in haksatna a la tuakdan chu a lekha thawtte hin imu, gingtute â ding ah ettawn ding a hidan imuu a. Zia te chu ensuk hitiu:

1) A lawsapnate: Paul in a lawsapdan hitin kichian tak in a gen hi, "Phatna ding ah ka bawl nawpte chu bawl seklo in diklona bawl ka nawplo chu ka bawl zaw sek a," (Rom 7:19) a tia.

2) A lunggel: Paul in a lunggel zosia a genna chun, 'La kiangun kichian tak ah ka gen a hi, ka lungthim nang uh lam in ka hi lian u'i a tina a hi. Living Bible a chun, "Ka lunggel zosia ka hun gen la hiu" a ti.

3) A beidawnna: Sawlchak Paul in a beidawndan chu hiti gual a hin a genlang hi—"Suapite haw, Asia ka tun ua ka thawkgimnau kha la het uh ka dawi u'i, ha'tak ah thawk zaw gual lo ah, hinle kinemlo khawp ah ka thawk uh kha" atia(2 Kor 1:8).

4) A launa: “La lak un zawngkhâl tak leh lau leh kithing kawm in ka um hi”(1 Ko 2:3) a ti. Paul in a hatlona chu hangsan tak in a puanglangngama, ei haw â ding in malzawlina a suak ta a hi. Ziagual a chun mi’n a hatlonate, a haksatnate, mi dawilo ah a umnate, lawsapnate, kihawng tak leh kingaitawm tak ah a hina diktak a genlat chun, a la ngai thatute â ding in Pathian hepina zia in malzawlina a hi sek hi.

Bible ah chun Pathian in mi kingaitawmte hepina a pe sek hi ti i mu’u a hi (1 Pe 5:5). Mi tamtak in kingaitawmna umzia a hiathiam ngai puau in, kingaitawmna chu bangmalo kei ah kikawinadan in a ngai ua, zia chu hilo in, lunggil diktak ah i hina suklatna a hi zaw a hi. Mi a lunggil ah a dik deu deu chun, Pathian hepina a mu tam deu deu hi. Mi kingainiam chun mi a hip in, mi zaidaw theite chun mi ngainat a lawu hi. Kingaitawmna leh zaidawna chu midang tawh i kiguizawpnau lampi chu a hi. Zia zia chun a hi Pathian in

mihat sang in a ma ah kinga zo mihatlo a matnawp sekna zia chu. Mite’n la hatlona hilo ah la hatna a muu chu, “ama â ding in a pha’n, kei vang hithei puana,” ti’n tiu in, amau fuitu hilo in, a suhatlo tu hizaw ding la hi. Ahinla, hatlo chung ah Pathian in a hun matdan a mu’u chun, “Pathian in ama le a matthei chun, keile ei mang thei in ah,” ti’n tiu in, nang chu mite fuitu leh tilkhautu hiding la hi. Hatna hin kielna a siamdawk a, hatlona’n a hileh midang tawh pankhawmna a siam hi.

4. La hatlona kisanpi in

Sawlchak Paul in a thiamna, a hiatna leh a seiletna haw kisanpilo in, a hatlona a kisanpi dan zia gual hin a gen hi. “Keivang ka hatlona tilo ngal suang pua’ngka,” (2 Ko 12:5) a tia. Setan in la hatlona a hun kawkmu chun pawm in, a hinla la lunggil in, Jesu i hatlona zosia ei hethiam pa leh Thagau Thiangtho ei panpitu pakna in la lungthim lua dim sak in (Heb 4:1; Rom 8:26). Pathian in nasa tak ah ei mat nawp zia in a chang leh i hatnateu hatlona a chan sak thei a hi. Etsakna’n-

Jakob in a ma dawidan leh tupdan ah chia ziang sek pa chu zan khat chu Pathian tawh a kibuan ua, “Lei malzawlo leh tha lo di ka hi,” (Thl 32:26) ti in Pathian a tuchak kei hi. Pathian in a malpigu kisuktuakna a khawi piak ah, tichun a malpigu kisuktuana chu a kipel ta. Pathian in Jakob thahatna chu a khawi ah tichun Jakob kêng a hung bai ta’n, mihat lai chu mihat lo a hi ta mai a hi. Zia ni ah kipat chun Jakob chu a kibai ta, Pathian in a lopina a chung ah a sukatna di leh, Jakob chu Pathian ah a kingak zawk diakna ding in, a hatna chu hatlona a chansak ta a hi. Tichun, Jakob in Pathian a ho inle a tiangkhut ah kinêl cha pum in Pathian a ho ta a hi (Heb 11:21).

5. Pathian in lopi tak ah a hun mat di la nuam em?

Chuti a hi chun la damsung zosia Jakob gual ah hatlo ah um la huam diam? Jakob in Pathian a buan ah, Pathian in a malzawl ah, a hatlona chu Pathian lopina sukatna a hung hitai. Nangle titakzet a pauchapna tawh Pathian la bawt chun, Pathian thilhitheina in sukdanglam in um in latin, Pathian in hun malzawl intin, la hatlona chu a lopina sukatna hung hitan ah. Zangaina dim Van Pathian chun mi a mat di chu dawichuam bik neilo a hi. Nangle a hun mang nuam zing a hi. Lalpa’n simtu zosia â ding in malzawl ta hen. Amen!

(Kivelsua: Sept. 2018)

Thudik Pawimawna

Bertrand Russell chun Hitler in Khawvel Kidopi II-na ah a guallel ziaak ziagual hin a gen hi:

“Hitler chun a dinmun uh hawitak ah a hiatchianlo ziaak a hi pen hi. Thusia hun pawte kha gawt a hi sek ua. Tichun kuama’n thutak a hil ngam tapuau ah, thutak a hiatlo ziaak in malakna kitup leh dik a um thei tapua, tichun, a gâlte chu a do zo talo a hi” ti in.

KHRISTIAN SUNKUAN

~ Rev. Khaisonthang Vaiphei

Khristian sungkuan siam chiat di chu gingtuten i thiltup leh duthusam uh pakhat a hia, i gam in a pawimaw dan i he chiat ua, malak didan le tamtak i hiatsau a hi. Khenkhat in pan nasak in i la tau ah, theitawp i sua zinglai un, a bul pat didan le helo leh haksa sa ma ma tamtak a ki-um thei kit hi. Kuamasap â ding in Khristian sungkuan chungchang ah thil pawimaw diakte ziagual hin vak taklang hitiu.

Kipakna sang ah thianthona

Khristian sungkuan ah chun taksa khawsak leh khawvel thil ah lawtinna chuam chuam sang in thagaulam thilte leh thagaulam kikaihuaina ngai pawimaw masakpen di a hi. Hun matdante, sum laklutdan leh matdante leh thiamzilna lam leh khawtang hinkhua ah le thagaulam hinkhua tawh kituak hawl masakpen di a hi. Tulai hin sungkuan tin ah a neupen ah kipat a lianpen tiang in a buai piu chu kipakna leh limna a hi. I thilbawl leh ngaitua zosiau hi kipakna ei pethei di a lunggel ziaka i bawl leh ngaituau a hi. Khristian

sungkuan ah chun kipakna sang ah thianthona hawl masak di a hi. I ngaituana leh nasepteu chu Pathian mitmu ah thiangtho leh pawmtak hi phawt henla, kipakna leh limna a nunung in kawi thei leu hin zia zosia chu piak belap hi di i hiu. Lawtinna leh kaisanna chuam chuam sang in thagaulam ah det tak in kiphudet gaw phawt leuhin sungkuan limtak leh kihepitua tak siamdawk thei di i hiu.

Sungkuan ah papen

Sungkuan tamtak a mumal theilo ziak uh pakhat chu thuneina chawitu kichian

HINNA VÂK

umlo ziaak a hi. Bible in sungkuan ah thuneina leh vaihawmna kisuangsawn didan kichian tak in ei hil ah. Pate chu insung ah thupukna siamtu leh thu vaitantu ding ah Pathian guat a hui. Ngaidan tamtak umsek maleh, thutawp siamtu pakhat a um di a hi. Pate thu chia talo ah, chate dawidan dan ah kihei ziang sungkuan a h'em, nute vaihawmna sungkuan a h'em chu Pathian dawidan a hipuai. Khrista chu kochuam luchang a hi gual in pate chu sungkuan luchang a hui. Luchang hina tu zolo papen chun a zi leh chate a hepi ta pua'i tina a hi. Hepina taksapna sungkuan chu insung nuam a hithei puai.

Naupangte

Bible in ei zilsakdan in, nu sung ah kipat gitlona ah puksia sa piangvek i hui. Dawitlna i nei chiat ua, himaleh i dawitlnau chu a zalen puai. Gitlona lam ah awnsa ah piang i hui ah, a phalam sang ah gitlo lam telzawk nawpna tawh piangkawm i hui. Chate hile hillo leh kaihuailo ah i kawi a hi chun, a phalam ah a

kiheidaw sangun a phalo lam ah a tallut uh bailam zaw a hi. Naupang cha a hilai ua kipat thuhil, zilsak leh lampi dik ah puite hi a pawimaw takzet hi. Sia leh pha a hiat masang ua kipat a phalam ah i puilutlo ua chun, a hung pitin phat ualeh ei thu hitalo di a hi. Kochuam bêl di leh kochuam leh zilsakna dik ngaisak ding in a neulai ua kipat i hilthei u'i. Jesu Khrista ah hukdamna a chan ua, Ama zuitu ginum a hui ah, a hindan leh nasep ua Pathian a lungawi theina ding in nu leh paten a khawhet thei masang ua kipat in i puihuai thei u'i.

Nupan kilungsiat tua

Chate hepi leh ngaisak a pawimaw zinglai in, nupan khenkhat in insung khawsak ngaituana leh chate â di gelna'n amau teni kingaisak manlo in hinkhua a mang ua. A kikal ua hepina zosia chate a piau ah, amau kilungsiat talo, chaten a chalmat ziaak a kikhenlo ham ham nupan le a um u'i. Chate chu ngaisak di him himaleu i kawppiteu ngaisak masak chiat di a hi. Khristian sungkuan dettak din

theina ding in nupan kiphudet phawt a ngai hi. Nupan mumaltak leh dettak ah kigawm a pawimaw hi. Nupan kikal ah kuama kigawlsaklo di a hi. Chate hi ziang leu le, Nu leh pa kilungsiattua leh kihothaitak kikal ah seilian chate chu a thau a muang ah, thu a mang ua, a phalam ah kaihuai a bailam ma mau hi.

Thukhakna

Pawsal leh numei kichen zia, thiltup leh duthusam chu Pathian lopina ding hi hen ti kawm ah nupan ah kisiamte

chun tup leh ngim kitup tak neisa'n sungkuan a hung dindawk sek ua, Khristian sungkuan a hung siamdawk mai u'i. Vainung ah Khristian sungkuan pawimawna hung hedawk thakte â ding in le a bul pat hun chu tu hun hi a hi. Kinepna i neilo nung in le Pathian chu a beidawng pua, a mitmu in a kikhel nai pua'i. Pauchapna tawh titakzet ah pan la leuhin Khristian sungkuan din chiat thei nalai i hui.

(Kivelsua: Sept. 2021)

Nunglam Enlo hileng...

Kum 1954 May tha ah khan, Roger Bannister chu minute 4 sung ah mel khat tai zo thei masa pen a hung hitai. A thakit in, Australia mi John Landy kiti chun 1.4 seconds ah tawmzaw in zia record chu a hung khêntha ngal ziang ah. Ki-etthakna chu a lo theilo a hung hita, tichun August tha in gualsiak mi te ni chu Vancouver, Canada in a hung kitaitek tau a hi. Agual tawpna a hi phat in Bannister leh Landy te chu a kitaitek pi te 'u masang lam tak in Landy makai in a tâi ua. A delpha ding kuama umlo ah, a zotu hi ngei ding in a kilang ah, ahinla, zawna khaugui a tun ding kuan in Landy chun Bannister in bang tiang ah ei delzui a hi em ti hiatnawpna ten ten a nei zia in, a nung et leh, a kalsuan chu a mansua ah, zia kâl ah chun Bannister chun a hun taikhêl ah, zotu hina a hung la zaw ta mai a hi. Vaikhawnung in Landy chun, 'Kinunghei lo hileng, zia kitaidemna kha ka zaw sa a hi' a ti 'i.

KHRISTIAN SUNGKUAN HI DI- PATHIAN LAU

~ Rev. Lalpiaklian
i/c Gangpimual Pastor Bial

Khristian sungkuan hilchetdan kibang khel puana, thumal pani Khristian ti leh Sungkuan ti kigawm ah kimang a hi. Maleh, sungkuan tin in Khristianna a chiapidan vang kibang khel puana. I thupiu Khristian Sungkuan hi di- Pathian lau ti hin Khristian Sungkuan hina ding ah banggual ah um di, kuate hi a hiu em Pathian lau kawm a Khristian sungkuan siamdawk leh din theite chu. Abraham in a chapa Isak zi di a hawl ah khan Pathian helote kha a dawi keilo a hi kha (Thl 24:1-9). Zia chun a etsak chu sungkuan din masang ah Khristian Sungkuan siamna di leh dinna ding ah, Pathian lemkuat ngaichang ah zia ding ah chu panlak a kûl masak dan ei zilsak a hi. Khristian sungkuan hina ding ah chun zia lungthim hi i put a ngai phawt a hi. A bulpipen chu Pathian a hi gual in, sum leh pai, nei leh go thil dang dang ngai pawimawpen a hi chun, Khristian Sungkuan hina ding a hin lawsam kha di i hiu.

Khristian sungkuan hina ding ah pawimaw tapi umte lak ah ziate hi vak enkhawm leu hin:

1) Pathian dawidan ah khawsak khawm

Khristian Sungkuan hina ding ah chun sungkuan ah i chenksamna ah Pathian dawidan ah i khawsak khawm uh a kûl hi. Kichamna,

kihepituana,kipanpitanate haw tawh khawsak khawm a kûl hi. (Eph 14:13). A hun a chun kingaidamna, thunuaigawl na, dawtheinate, i nei a kûl hi (Kol 3:12). I kizilsaknau leh i khawsak khawm nau ah hin i paukam mat dan tiang inle Khristian sungkuan bawl di chi a hi em ti ngaitua zel di a hi. Pathian

in le sungkuan hi a ngai pawimaw ma ma a hi.

2) Dodaltu lian a um

Khristian sungkuan hina ding ahin dodaltu liantak a um a. Setan in suksiat gua in lampi chuam chuam in ei dodal zing hi. Sungkuan masapen Adam-te sungkuan kha le a dodal ah, a sumualpho a hi kha. Thuthung bawsiatnate, tual thana tiang a tung a hi kha (Thl 4:1-8). Lawsap chang tamtak um sek ina. Eima bep hilo in Bible ah le mimasate le a la lawsam ua, maleh Khristian ihu chun Pathian in sungkuan a dinna ziahte hi lawtinsak i tup diu a hi. Zia lungthim chu i put uh a hi chun i hatlonau ah pat hatna thak piak ah um in lawtina chu mu ngei hitiu.

3) Sungkuan ah Pathian biak khawm

Khristian sungkuan hina ding ah pawimaw, himakmaw chu sungkuan ah Pathian biakna hi a hi. Nisîn khawsakna ziahtu, insung ah i thil neite, *information technology (Phone, tablets/ computer)* ziahtu te'n i sungkuan kikhawpna hi ei subuai ma ma ta a hi. Kihotua

le um mumallo in a umthei hi. Pathian biak khawm vang vang chu ei subuai ma ma hi in a kilang hi. Tup tintenlo vang chun sungkuan ah Pathian biak hi a hitheilo a hitai. Zia chu a hi zinglai chun sungkuan kikhawp pawimawna a kiam diak pua, a pawimaw deu deu ngala. Zia ziahtu chun, Khristian sungkua hina ding ah chun tup leh titak takna a kûl hi.

4) Nupa'n kipumkhat:

Khristian sungkuan hina ding ahin nupan ah kipumkhat tak ah sungkuan etkawlina hi a hi. Nupan kithugual leh kituak tak ah insung etkawlina ah hin chaten a cho ma mau hi. Taksa leh thagau ah khan hawitak in a khang thei ua, a ga hawitak mudi a um sek a hi. Dawidan leh thupukna kibanglo a um chun ga phalo a gadaw khawlaw sek hi. Chate hiat ah kisawiseltua leh kinialnate a um a hi chun Khristian Sungkuan siamna ah hin a hisel pua, pumpel ham guat ding a hi.

Atawpna ah chun, Khristian Sungkuan siamdawna leh dindawna mu chu vangam teplawkna a hi ngala.

PATHIAN NASÊMTU GINUM

(II Korinth 6:1-2)

~ Upa Ginkholian
S. Munnuam

***“Pathian hepina chu phatchuampi lo ah chang la hilona
ding un, ama seppite hin in ka hun ni la hiu, Ama chun hun
kipakum ah ka hun ngaitha zing in Hukdamna ni’n ka hun
panpi hi a ti ngal a, Ngaitiam un tuhi hun kipak um chu ahin,
ngaitiam un tuhi hukdamna ni chu a hi”***

Pathian in ei hepi ma maziak in a chapa changkhat neisun ei hun piai. A hepina chu ei hepi gual tak ah i phatchuampi di a hi zinglai in phatchuampilo thei a hidan a kilang hi. AD 55 hunlai in Sawlchak Paul in Korinth mite kiang a zia gual hin a la gen a hi. La chan uh hi la phatchuampi ngeina ding un, Ama seppite hin in ka hun ni la hiu, a la ti a hi. Paul in Korinth mite kiang in ziagual ah hin a hun genzawm nalai hi. Hun kipak um in ka hun ngaitha’n Hukdamna ni’n ka hun panpi hi a ti ngal a ti’n, chuleh ngaitiam uh tu hi hun kipak um chu ahin, ngaitiam uh tuhi hukdamna ni chu a hi

a ti a hi. A hepina muchiantu leh changtute hin chu, Pathian lalgam nasêmtu ginum a hinau kichian tak ah mu di leh sim thei ding in amau lam sang in midangte kiang ah Pathian lopina kilat hi pawimaw a sak ziau leh a ngaikhawk ziau a kilang ma ma hi.

1. Pathian nasêmtu i ti tak leh i ngaidan tângpiu chu, Minister, Pastor, Pro. Pastor, Upate, Tual Upate, Missionary-te leh a dang dang le um ina, ziate haw hi a tangpi ah i kawidan a la hi kha sek a hi. Ahinla, Paul in a zilsakna leh a dawisakna ah kipat ah hin chu mi zosia’n Pathian hepina hi

phatchuampi chiat ah Ama gual ah nasêmtu ginum hi din mite a phut a hi. John Calvin in “Work is Worship” a ti hi hawi ka sa bîk ah, Pathian biak leh nasêmtu hina ah hin hunbîk a nei pua, i sep i bawl na zosia leh i tawidanteu leh i kampau haw zosia hi Pathian biakna leh Pathian nasêmtu i hinau hi a kilat zing zawk hi a pawimaw ma ma hi.

2. Mupi kisiam thak kitna kipat hin Pathian nasêmtute â ding ah pawimaw ma ma khat chu a hile, mupi hi a hâtna awl awl in a hung kiam hiai hiai a, a tawi kin thei tapua, a leng hat thei ta pua ama hatna ah kipat hin bangma mat phak leh mu phak a nei tapua, nek di nangawn le a kimu zo ta seklo a hi. A tin leh a muk chu a mawl ta, a multe le a kîl a, gamsa leh ganhingte man ding ah a leng phat leh a mul a pul sek zia in, a ganhing mat dite’n a hiau ah a zâm mangsek u’i. Ziagual a hi zinglai inle a hina chu a bei pua, mupi a hi tho tho hi. Zia hun tak

chule midang enlo in ama leh ama kimuchian zawk na’n leh kisiamthak na’n hun a mang tamzaw sek hi. A hâtna a beita, suangpi lak tâng sang chung in a chêng a, a tin leh a muk chu suangpi’n a tâthiam a, a mul kîlte chu khat khat in a bawt tha a hung kithak pat kit sek a hi. Pathian nasêmtu gingu i hina apat hin i khut thak dante, i paukamte, i tawidante leh i umchante haw apat hin kisiamthak kit hi Pathian nasêmtu ginumna kawng ah hin pawimaw ma ma khat a hi sek hi.

3. Aram-te Lengpa’n a dawisak ma ma Sepai hotulian Naman chanchin apat hin vak thîl kit leu hin. Ama hi midangte’n a hetpilo amau nupan bep in a het lungngaina pakhat a nei hi. Zia chu a taksa (hhak) a hi. A van ah a hung kithuam tak leh kuama’n a hetpi pua kuama’n le a mu theilo a hi, ahin amau nupan ngawn a um phat uh leh zia natna chun a sulunggim ma ma sek ah, a lungngaina pen le a hi.

HINNA VÂK

Ziagual ah chu lungngai leh beidawng tak ah a nupa'n ua a um zing lai un, Israel numei ngaklak galhing mat ah um (*suak a min kigenlo*) chun a kiholimnau ah kipat chun a hung hedawk ta a hi. Zia phat chun a zi kiang ah chun kapu hi Samaria ah Jawlnei kiang in va chia le aw a tia, *zia apat hin Pathian nasemtute a hiloleh gingtute hi khawitak in um le hinle Pathian lopina kilat theina ding ah hin chu mun a hiloleh hun awng thawl a um zel sek hi ti mu thei a hi.* Zia kipat ah chun Samaria ah chia ding in a hung kisau ah, thilpiak dite haw chawi in a kipan dawk tau hi.

A mun a tun phat un Jawlnei chun Jordan lui ah sagivei kidia ding in thu a pia ta. *Zia tak ah hin ama ngaidan leh a ginchak gual a hilo phat in Naman in suanlam a hun siam ta, ziate chu Israel gam luite zosia sang ah pha zaw Pharphar leh Damaska luite a um hi ti a hi.* Zia phat ah chun

(*suak dang khat a min kigenlo*) hepu Jawlnei chun haksa tak ah bawl ding in thu hun pele le la bawl di hilo a hem, a ti phat in ama le Jordan lui ah chun a hung kidia ta. Gukvei tiang hial inle bangma a phachuam pua, a sagiveina chun a hung pha ta, a lungngaina leh a beidawwnna zosia chu a navak tai ti muthei a hi.

Suapite haw, Pathian nasêmtu ginum i hina'u ah kipat ah hin mite muthei di leh simthei i hung hitheina ding ua chun, sep di leh bawl di Pathian in ei piakte leh bawl thei ding ah ei guatna tiang ah, Ama biakna ah ngai ah, a lopina ding ah sem ah midang te'n le a phatchuampi ngei ding ua semtu hidin i kidawisak a hi. Pathian nasemtu lawting i hi theina ding ah lampi pawimaw ma ma chu mani kimuchian ah kisiamthak kitzel sek leh mani hina tawk ah thumatna hi a hi sek hi.

Simtute Lalpan Malsawm ta hen !

THIAMZILNA PAWIMAWDAN

~ *Tv. Kamneu*
New Moreh

**“Ka mite chu hetna a taksap ziak un sukmanghai a hiu”
(Hosea 4:6)**

**“Naupang chu a chiana ding lampi dik zilsak lechin, a teknung
tiang inle thasuak ta pua’na”
(Thupilte 22:6)**

Thumapui: Thiamzilna hi Pathian in mihingte â ding ah a malzawlina thilpiak khat a hi. Zia hin mihing hinkhua a siampha, khawtang a suhat ah, gam khat a dawmsang thei hi. I ngaituana, lungthim leh i umchan â ding ah matchak pawimaw mama khat le a hi. Thiam zilna kipat ah hin hiatna bep hilo in, hiatthiamnate, umchanphate leh vaihawm thiamnate ei pe nalai a hi. Gingtute â di bîk in, thiam zilna hin, hiatthiamna thukzaw, ginna hatsaktu, Pathian guanggalna pawmthiamnate ei neisak thei a hi.

Hosea 4:6 ah chun hiti hin a kizik hi, “Ka mite chu hetna a

taksap ziak un sukmanghai a hiu.” Zia hin ei hun hiatdawsak chu a hileh thiamzilna leh hiatna hi, nisin ah i thagau hatna ding in le a pawimaw zing hi. Thiamzilna hi Pathian in mihingte â ding ah matchak pawimaw tak a hi.

Thiamzilna pha nei theina ding ah pawimaw masapen chu nu leh pa a pat zil hi a hi. Nu leh pa te’n zia hi i hiatzing ding ua a pawimaw ah, sungkuan hi khawvel ah thiamzilna sikul masapen chu a hi. **Thupilte 22:6** ah chun ziagual hin a kimui, “Naupang chu a chiana ding lampi dik zilsak lechin, a teknung tiang inle thasuak ta pua’na.”

HINNA VÂK

Thiamzilna pha neina ding ah a bulpatna chu naupang hunlai hih a hi. Insung apat, a bul pat dik a ngai ah, nu leh pa te'n le a chateu chu zilna a pawimaw zia leh a phatna a hil ua, pitinna lampi a zawtpiu a pawimaw hi. Thiamzilna ngai pawimaw nu leh pa chun zilna ngai pawimaw chapa, chanu a nei ah, zilna ngai pawimawlo mi chun zilna ngai pawimawlo chapa chanu a nei sek hi.

Sikul In hi naupangte'n a hun uh tamzaw a matnau mun a hi zia in zilsaktute (*teacher*) hin, a naupangteu chu gunchu leh diktak ah a etkawl ding uh a pawimaw hi. Hotute hi naupangte lawtinna ding ah dinmun pawimaw tak ah ding a hui ti hi hiatmillo a phai. Zia zia chun zilsaktute hin law muna di bep ah sem hilo ding in, a naupangte thiamsak leh masawinna di ngaituana lungthim a put ua, sep tak tak ah a sep uh a ngai hi.

Kothari Education Commission i et a hi chun thumapui chun ziagual hin a zik hi, *"India gam hung chiatozel didan hi, tu ah class room sung a hin a kinga*

a hi" a tia. Zia hin zilsaktute dinmun a pawimaw dan a taklang chian ma ma hi.

Tu dinmun ah hin gam chuam chuamte hawle thiam zilna lam in ki-tet, ki-elna a um tai. Zia chun sum leh pai lam dinmun ah le khantona a um sak hi. Thiamzilna chun khawvel sukdanglam theina a nei ah, khawtang ah thiamzilna a hung um phatleh, khantona lamdik ei kawkmusak sek hi. Mihing khat in thiamzilna a nei chu kuama'n a lakpiak theilo go a hia, thil phachuam leh a lawk mutheina ding in ei panpi thei hi. Nu leh pate'n le i chateu hi a hi thei chan in a thiamzilna ding uh ngai pawimaw piak di a hi. Zia chun khawtang â ding ah thilpha hung pawlut thei di ahiu ah, thiamzilna chu gam khat khangtona ding ah kalbi pawimawpen a hi zia in mitin in theitawp ah a ngai pawimaw uh a ngai hi. Khawvel ah gam chuam chuamte haw i vak et a hi chun, thiamzilna ngai pawimaw gamte hi a khangto diak u'i.

Etsakna'n – thiam zilna lam ah hin US, UK, Canada, Finland,

German chuleh Asia gam huap ah Japan, South Korea chule Singapore te hi a sang pente lak in a pang zing thei uh a hi. Thiamzilna a ngai pawimaw dungzui un a gam uh a khangto in a changkang diak hi.

Nelson Mandela chun, “Thiamzilna hi khawvel sukdanglam/sangdanglam theina ding ah a galvan pawimawpen a hi a ti.”

Hiatchian thei khat chu gam khantona ding ah chun a mipite leh a gam in thil a neite (*resources*) a gam apat thil hung pawtdawkte ah kipat hin a hiat thei hi. A gam mipi khut in a kinga ma ma ziang ah, mipi lungput siamzanna ding ah chun thiam zilna a pawimaw kit ah, zia zia a chun thiam zilna hi khawitak gam inle a mamaw pen chu a hi. *Technology* lam changkanna ding ah hinle thiam zilna hi a pawimaw kit ah, chuleh thil dang dang in le hiatna/thiamna ei pethei hi.

Tulai khawvel kidemna chu lekhatiam (*hiatna sang*) lam hi a hia, zia chun gam economy lam a sukhangto thei kit a hi.

Mihiam lungput/lungthim hin, khawtâng â ding ah lampi chuam chuam ah khantona leh masawanna lam ah a phatchuampi ma ma theina ding ngaituadaw theina leh bawldaw theina giltak a nei ah, zia phatchuamna haw sepdawtheina ding ah chun, thiam zilna hi a kalbi pawimaw masapen chu a hi kit hi. Zia chu kibulphudetna, mitin a khanto zelna ding ah chawpkan theilo thil pawimaw ma ma a hi.

Khenkhat in taksa damtheina hi gam changkanna ding ah kalbi pawimawi zaw a hi a tiu. A zia chu mipi damtheina a um phatleh nuam leh buting tak in thilpha a hung pawtdawk zawthei a hi a tiu. A hivan in, thiamzilna zia in damtheina a kinei thei ah, nat leh sat apat in le i kiving thei hi. Thiamzilna nei zia in ziagual ah kipat kiven theina mitvakna lungthim ei pia, chuleh nicheng ah i tuak hatsakna leh buaina apat inle lampi dik ei kawkmua sak thei hi. Lekha i simteu leh chanchin i hiatteu hi hiatthiamna in a hung kihei dawak sek ah, zia kipat chun i buai leh haksatnate haw i bawl diu dan lampi phazaw

HINNA VÂK

leh dikzaw ei musak thei di a hi.

Mihiam thiamna diktak nei mi chun thiamna zatchuam chuam le a nei un, zia bep chu hilo in amau taksa â ding ah a pha leh a phalote hiatkhen theina a nei un, damtheina a ngai pawimaw sek ui. Sualnate, gitlonate chuleh natna chi chuam chuam hawle a subei thei a hi.

Thiamzilna duthusam chu a hileh chawndan siamtup,

lungthim detsaktu, ngaituana sulian, chuleh mani keng ah ding thei ding ah ei siam piak thei hih a hi.

Thukhakna: Thiamzilna hi mihiam khantona di leh khawtang phatna ding ah matchak lul mama khat a hia, a bîk in gingtute hin, Pathian thilthawnpiak gual ah i gel ua, gunchu leh kukal tak ah zil ding in Pathian in i mau ei puizel ta hen!

Haksatna leh beidawnnate a hung tung a, thuak zo talo di hial ah kihiatna, dam man um talo hial ah kingaina hin bangkim a tawp chu a hi tai tina a hi puai. Khrista hepina ziak ah HIN hi a um a hi. A ziak kichian tak nei ah Pathian in a siam, i hinna lul tak mai bangmalo mai chansak ah mani hinna lak hi a pamai talua a hi. Dinmun beidawng um tawp khawk lai ah le i Pathian uh kiti di zakcha ngailo, thawkna musit um leh thina huaisia thuak tak a thawk hun tiang ah ei hepitu chun, “Ka hung hepi hi, hung thathamlo ding ka hi” ti’n Kraws in nang leh kei â di a kap a hi.

I kingaknate phel thak ah um in, i thil neisun lul takmai lakpiak ah um maleh, hepitu zâl in dam man a um hi. Bukimlona khawvel leh gin tâklo mihing ah i hinna i ngak chun zia hin chun limna chawldamna tak tak mu ngailo ding i hi. Thil zosia bei hun ah le bei ngailo leh setheilo Kumtuang Suangpi Khrista chun kinga leu hin-

“Lei thil mangthai ta un, Jesu ka nei; Kei a’n khua a vâk ta’i, Jesu kei â. Ka thagau damna chu, Jesu kiang in a um. A thisan in ei tan, Jesu kei â” ti zing di i hiu.

Khawvel mangthai maleh Jesu i nei ua, Zia ziak chun, i hinna’u neitu leh vawptu Lalpa lam nga zing ah Ama lopina ding leh a Lalgam keklian zel thei ding in i hinna’u Ama â ding in lân hitu.

KHANGLAITE LEH POLITICS

~ Upa Douminlian
New Lamka

Khanglaite hi Kochuam khut leh keng ah pangte a hui. A thupi'u, 'Thilpha hi ding ah hukdam' (Eph 2:10) in a gengual in thilpha hi chu a bawl makmaw gual un a ngai uh a hi. Pathian thupiak gual zel ah midang â ding ah thilpha hi chu a nasep uh a hi. Pathian Kochuamte suhlimtu leh suhhattu a hi kit u'i. A vanglainite'u Pathian â ding ah a matna'u hin Lalgam nasepna ah masawna dawiumtak a tun sek a hi.

Gam kivaiahawmna hi *politics* i ti chu a hi. Gam in kivaiahawmna dik leh pha chu a mamaw tak zet a hi (Sam 72:2). Kivaiahawmna dik leh pha umna gam chu gam nuam, zia chu mi a chengte zosia a ding ah muanna leh bitna mun a hi sek hi. Khawvel ah gam zosia hin le ziagual kivaiahawmna dik leh pha tundawna ding a hin theitawp sua'n pan a la chiat u'i. Ei uh gam India in le zia ma chu tup lian tak in a nei zing hi.

1. Khanglaite politics ah a kihel ding uh a hi.

Gam kivaiahawmna dik leh pha um theina ding in khawvel gam zosia hin

theitawp sua'n pan a la chiat u'i. Ahi'n, kivaiahawmna dik leh pha nei zing ziang gam chu um zing zianglo a hi. Bang zia ah gam kivaiahawmna dik leh pha chu a um zing haks a hi diam maw? Mi khenkhat in a ngaituadan a gen sek uh chu, Pathian thu leh *politics* hi chiakhawm saklo di a hi a ti'u. Chuleh, amau haw'n a gen zelna'u ah chun Pathian leh a kochuam huang sung ah kimangchate chu *politics* ah kihel ki'u hen ti hi a hi. Himaleh, unaute haw gun tak in vak ngaitua tiam'u, gam kivaiahawmna dik leh

pha chu Pathian ginglotute siamdaw ding ah kawi thei a hi diam? Keima ngaidan in chu Pathian ginglotute'n *politics* dik leh pha siamdawk thei ding un ka gingcha puai. Pathian lau ah Ama dawigual lampi hawtute ma ma chu gam kivaihawmna dik leh pha siamdawk dite chu a hui. Khanglate'n *politics* hi Lalpa dawidan tawh kituak ah a puizan guat ding uh a hi. Tunung sawtlo ah *politician* hung hi di chu tu ah khanglaite ma hi a hui. Khanglaite hin gam kivaihawmna ah Pathian dawidan ah pan a lak ua diktatna leh ginumna ah *political foundation* a siam di'u pawimaw a hi. In le a *foundation* a hawi leh a muan-um ah chenna tâk a hi gual in, gam kivaihawmna dik leh pha umtheina ding in *political foundation* dik leh pha siamdaw masak ngai a hia, zia ding a chun khanglate'n mawpuakna pawimaw tak a nei u'i.

- 2. Politics diklo leh phalo chun mi zosia a suhlam hi.**
Ngaitua det detlo mite

ngaituadan ah chun, *corruption* hi a bawltute'n lawkpi ma ma ding un i ngai mai thei u'i. Ahin, guntak ah ngaituatute mudan a chun vang gawlgukna bawltute hin a thuak nasa pen u'i ti hi a hi. Zia *corruption* in a huapkhakna mun ah cheng mi zosia'n le liamna a tuak u'i. *Politics* diklo leh phalo mellatdan pakhat chu zia *corruption* hi a hi. A umzia tak chu, gam kivaihawmna chu a la dik in a la pha ta leh chu *corruption* chu umlo mai didan a hi. Gam leh nam le zia *politics* diklo leh phalo hin a damlo sak sek hi. Gam kivaihawmna diklo leh phalo chun khantona dik leh pha um di a phallo a hi. Gâl leh tual umsek zia hile *political instability* zia a hi pen sek hi. Gam sung ah buaina zat chuam chuamte leh gitlonate haw hile a diktak ah chun gam kivaihawmna diklo leh phatlo zia a hi tângpi hi. Zia gual ah kivaawmna diklo leh phalo gam sung ah chen khak hi chu a da-um khawpmai hi.

3. Politics dik leh pha chu kua siam di a hi diam?

Mi zosia hi khawvel ah gam khat a hiloleh gam dang khat tei kivaihawmna nuai ah cheng leh khawsa chiat ihiu a, a siat leh a phat le thuak chiat i hui. Gam kivaihawmna dik leh pha siamdawna ding in nang leh kei pawimawna a lian khawp mai a, midang mawk ngansia thei di a hi puai. A bîk tak in khanglaite'n le *politics* dik leh pha tundawna ding ah hin Pathian in a mimal ua mawpuakna a piak dungzui a hin theitawp a sua diu a hi. A ziak chu *near future* ah *politician* dingte chu amau a hui. Chuleh, Khristiante i chen tam-penna gam zosia ah hin kivaihawmna dik leh pha tungding chiat ta le'u hin ginglotute chen tam-penna gam te'n le i Lalpa Pathian uh ginna hung nei thei ding un ginchakna liantak a um hi. Chuti chu hi ta leh, *politics* dik leh pha tundin chu Pathian Chanchinpha puanzakna

pawimaw tak ti thei di a hi. Pathian in vaihawmna dik a ngaina, kivaihawmna dik leh pha umna mun ah chun ama malsawmna daw-um tak chu a tung sek hi. Zia munte ah chun Pathian chawihawi in a um sek bawh hi.

Khanglaite'n *politics* dik leh pha tundinna ding in panmun pawimaw tak a nei ua, zia ding a chun khanglai member tin te'n a lungthim gil tak ua Pathian launa tawh 'Keima ka panlo leh lawtinglo di a hi' a ti thei chiat uh a ngai hi. Khawvel ah hin kithenna a um-theina chu eima ah kisang danglamna hi a hi. Zia ziak chun, *politics* dik leh pha siamdawna ding in eima leh eima sunggil lam dikna leh Pathian dawigual ah kisiampnatna a um masak a ngai hi. Ahin, i Lalpa Pathian mapuinalo chun mihing kisiampnatna um-theilo a hi. Khanglaite'n theitawp sua'n Pathian hatna suang in ma sawn-to zel di'n dawisakna i lan uh a hi. Lalpa'n a thu malsawm ta hen.

I DAMLAI TUANTHU SUT

~ Pi. Thianneilian @ Th. Ashy Vaiphei
S. Munnuam

Nang, zia'h lekha simtu hin, la damlai kum bangzat a hita'm ti hethei ngei inla tin, himaleh, bangchan mang nalai di la hi em tivang kuama a helawk thei i um puau hi. I damlai chanchin uh hi nungsui chiat leu hin, tuni tiang i hun mat danteu ah kipat genlat thatnawp um chanchin leh genlat ngamlo chanchin tamtak nei chil-chel hitiu. I damsung hinkhua i kalchawidan zosiau hi TUANTHU a chang zel in, zia'h tuanthu i sut zel chu mite'n banggual in a hun sim un, banggual in a hun gen zel diam uh ti ngaitua a pawimaw hi.

"Nangmau hi ka lekha chu la hui; ka lunggil sung ua kizik, mi zosia hiat leh sim chu la hui hi (2 Ko 3:2). "Mi zosia hiat leh sim chu la hui" ti'n a la gen hi. Kochuam te, khawtang mite, i nisîn lawipawlte bep a tipua, "mi zosia" a ti ahia, a huap lian khawp mai hi. Kaina leh Abel thillat chung khan "Lalpa chu Abel leh a thillat ah chun a kipak ah" ti'n a la gen ah, a nasep leh a thilbawlte zia in "La naupa thisan aw chun lei ah kipat in ei hun ko hi (Thl 4:10) ti in Pathian in

Kaina kiang ah a la gen a hi. Abel damlai tuanthu sut hi a lopi mama ziang hi. Damlai tuanthu a sut belap theilo hun tiang inle "a thisan aw chun Lalpa a ko" ti i hethei u'i.

Tuni hin i damlai tuanthu sut ua hin Lalpa a kipakna diam ti i ngaitua thak uh a pawimaw hi. Lei ah kochuamte ziang inle i chanchin genlat ding ah kilawm a hiatlo zing lâi ua, Lalpa kipakna ting chanchin nei i hi ding uh taksan a umlo a hi. I damlai tuanthu sut tuni a hawilo leh, bangtik leh mi

zosia hiat leh sim thei ah i sut ding a hi diam ti ngaitua a ngai hi. A ziak chu, hinna hi Lalpa â a hia, thina hile Lalpa khut in a um hi ti i hiau. Dikna ziak ah damlai tuanthu, mi zosia hiat leh sim thei ah i sût pek uh chu Lalpa lunglam a hi.

Insung genthei tak i hi ziak in i tuanthu a sepua, Government ah nasepna neilo i hi ziak unle a buai diak pua, kochuam leh khawsung puitu ah i panlo inle damlai tuanthu i sut zing chu mualpho in tawm diak pua'na. Himaleh, thanhuainate, papnate, khamtheina tawh damsung hun matzawnate, lungawina him him neilo ah um nate, hiatpitu diklo ah panna leh a dang tamtak te ziak hin i damlai tuanthu sut hi Lalpa ah pawmtâk hung hilo di a hi. "Midiklo chu diklo in um mai henla; mibuak chu a buak in um mai hen; chuleh, mifel chu a fel in um hen la; mithiangtho chu a thiangtho in um ta hen. Ngai in, hung vak ziang di ka hi tai; mi zosia a nasep dungzui chiat ua piak ding in ka kipakman ka kiang in a um tai" (Tpn 22:11,12)

ti'n a la gen hi. Midik lo chu a diklo ah, mibuak chu a buak ah, mifel chu a fel ah, a thiangtholo chu thiangtho ah a um hun leh, tu i damlai tuanthu sut hi i hawmthaw khatawl diam? Hawmthaw ziak ah belap theina thâ lah nei tapua'i tin maw...! I nasep dungzui ua i dawn ding uh kipakman "ka kiang in a um tai" titu Lalpa thupukna chu a tawp a hitai. La hun chiasa gel inla, tuni i lungtup leh i nasepdawte enthak kit hitiu.

Ka lungthim ah manglo, ka puaknatpi bek ziak ah chanchin hung kilang sek chu: upa khat damlo gim mama ziang ta, damdawk kit ziang thei natna le hitalo ti a genna'u ka hiat ziak un khanglai pawl te'n vena ka vanei ua, aman ka kiang ah a gen chu a hi ka puaknat, - "kidam kit henla, khanglai kikhawpna ah dâkkhen leh lapuitu in thakhat bek kipang leh ka nuam sam e!" tithu hi a hi. A damna di dawn in ka pauchap ua, himaleh, a huntiam tung a hitâk ziak in ka lawting zo tapuau hi. Nang leh kei huntiam le hung tung

HINNA VÂK

ngei ngei intin, nawp nailo ziaak in belap thei diak tapuai tiu. “En tiam un, vante kihawng leh Mihing chapa, Pathian changlam ah ding chu ka mui” ti kawm in i damlai tuanthu i sutawp thei diam? Ahiloleh, “Khanglai kikhawpna ah dâkkhen leh la puitu in ka pang nuam na e” i tizaw diam? Thina Jordan gâlkai theina di lampi

chu i siam zing nalai u’i. Haksa tak ah pal thei i hia, kithalawp tak ah pal thei i hiu. Zia chu eima chiat mawpuakna’h kawi a hi ziaak in, ding dawk in kipan thak kit hitiu Lalpa leh a gam a di’n.

Lalpa’n simtute zosia, taksa leh thagau halthakna tawh malzawl chiat ta hen, Amen.

THU HIATPITU

Ref: Nasepte 1:8 ‘Thu hiatpitu’ ti hi Khrista chanchin a puan zâk ziaak ua a hinkhua’u hial le châte genna a hi. Ziaziakchun, Lal Jesu’n ‘Ka thu hiatpitute hiding la hiu’ a ti hin hiat mai mai a kâwk pua, Lal Jesu chu Hukdampa a hi ngei hi, ti hia pawm a, a hukdamna thu puang dawk zel a, thi a kûl inle martar ngam dingte a genna hi in a kilang hi.

Jesu Khrista thu hiatpitu ahin i pang ngam tak tak diam uh? ti hi dawtna pawimaw tak a hi. Ama min ziaak ah thuak ngam, chên ngam leh genthei ngam tak tak hinkhua a hi ti i hiat uh a pawimaw hi. India gam ngei ah hinle Khristian za ah 3 vel bep i um ua, Khawvel pumpi huap inle gam thim pawl i hiu hi. Sakhaw mi ma ma gam, himaleh thutak Pathian thu hialote kiang ahin ‘a thu hiatpitu’ i hi ngam na di’u em?

KNP HUANG



Ni 16 August, 2025 (Kiginni) Dongjang Pastor Bial in Dongjang
Kochuam Biak In ah Seminar mat a hi.

Resource Person: Rev. Summinlian Vaiphei, Bialtu Pastor



Ni 15 August, 2025 (Simhaini) Mata Pastor Bial CKNP Bial fan
Buallian Kochuam Biak In ah mat a hi.

Hun mangtute : 1) Pi Chongneu, Comt. Member
2) Pi Chongmoi, Comt. Member



CKNP Bialfan Ni 19 August 2025; New Lamka Pastor Bial
Thugentu: Pi Niangdawitig, Comt. Member

HINNA VÂK



Phaipheng Pastor Bial ah CKNP Bialfan

A hun : Ni 18 August, 2025 (Seppatni) | 12 :10 p.m.

Hun mangtute : 1) Pi Neikhawvak, General Secretary CKNP
2) Pi Manneimuan, Assistant Secretary CKNP



Phailianbung Pastor Bial ah CKNP Bialfan

A hun : Ni 18 August, 2025 (Seppatni) | 7:00 p.m.

Thupi gentu : Pi Neikhawvak General Secretary CKNP



Gangpimual Pastor Bial ah CKNP Bialfan

A hun : Ni 24 August 2025 (Kiginni)

Hun mangtute : 1) Pi Kh. Thianniang, CKNP Chairman
2) Pi Bemshi, Committee Member CKNP



Sunna

UPA T. THANGA VAIPHEI (1953-2025)



Upa Chuanminthang hi 1953 kumin Torbung khua'n ala piang hi. (L) Pauzaneng leh (L) Soikhoniang te chapa 2 leh chanu 2 te lak ah a pathumna a hi. 1975 kum in T. Ngainu tawh ala kicheng ua, chapa pathum a nei u'i.

1. Nengthamuan (H/o Doithianhoi)
2. Siamkhanlian (H/o Kimthianhoi)
3. (L) Thian Joel

Nasepna lam

1976 ah pat khan Sericulture Department ah ala sem ah, 2002 kum in voluntary pension ala la ta'i. Zilna lam ngaikhaw mi a hia, 1985 kum in S. Bualjang khua'n Children's Model School ala phudawk hi. 1997 kum ah gam buai ziakin Kangvai ah chawmkhat ala khawsa, 1999 kum apat S. Kotlian ah ala pamlut hi.

S. Bualjang ah EOC (P) Kochuam ah mawpuakna chuam chuam ala tuk to sek ah. S. Kotlian ah a pamlut nung in 2003 kum in Kochuam upa dingin teltin ala hia, 13/12/2003 ni'n Rev. P. K. Lianmang khut ah ordination ala chang hi. Kochuam leh Bial ah mawpuakna chuam chuam ala tuk hi. Pathian nasepna lunglut leh mi pawlnuam ma ma a hi.

A Hun Nunung Lam

Sunglam hatlo leh luchang natna te ziakin ala ki-enkawl zing ah. 2023 November tha in thinkha ah suang um mudaw a hia, BP ziakin surgery bawltheilo in damdawi in ala ki-enkawl ah. 2025 kumbul apat taksa chau leh an dulo in sawiselna a hung neikit ah. April tha ah khan District Hospital ah etkawl ala hia, doctor ten theitawp a sua maleu phatlam manaw loin inmun ah etkawl a hi. A dinmun sedeu deuin May 6, 2025 ni'n kumtuang gam ah eila chawlsan ta'i.

Vuiliamna Programme hi Biak In ah Upa Thualkholian, Ex-Moderator, Lamka North Presbytery in hun mang in, Kochuam Lapawl te'n thakna La a sa thei ui. In mun leh Thânmual ah Rev. Kamkhotinthang Neihzial, Executive Secretary in hun a mang thei a, Insung mite leh Kochuamte'n it tak leh ngai ma ma chung in vuiliam a hi.

*Report petu
Upa Kailianjoy
Secretary
S. Kawtlian Kochuam*

UPA SAWITINTHANG (1954-2025)



Ama hi 1954 in Phaiba khuá'n a piang a, Kum 1975 in Pi Tingkhawlam tawh pindan in a la kikhutsui un, Pathian malsawmna chapa pagiat (8) a nei hi.

- | | |
|-------------------|--------------------|
| 1. Damthianzuan | 5. Khamlunmang |
| 2. Lallemlian | 6. Kamsong |
| 3. Upa Lammuanlal | 7. Kaichawilian |
| 4. Kaplalsan | 8. (L) Kimthiansam |

A tute: Pawsal - 13; Numei - 14 leh tusawn - 2 a nei hi.

Nasepna lam

Kum 2005 in Upa Ordination Jubilee Kochuam Biak In ah Rev. Khupneithang khut in a chang hi. Presbytery Committee chuam leh Bial Committee chuam chuam ah panmun nei sek in chuleh Bial Chairman in le a la sem sek hi.

A Hun Nunung Lam

Taksa hisello pum pum ah Kochuam ah kum tamtak a la sem ta chu, Lamka ah Doctor zuan ah ki-enkawl ah a um zinglai in Ni 29 April, 2025 zingkal matak in zia khawvel ah a ngai cheng ei la nusia tai.

Ni 30 April, 2025 ni'n Tanggam Presbytery Moderator Upa Thiankam in Biak In ah hun a mang a, In mun leh Thâmual ah Rev. Lallunglian Vaiphei, Bialtu Pastor in vuiliamna hun a mang hi.

*Report petu,
T. Upa Lamneikhup
Phaiba Kochuam*